

Date – 25/08/2025
Time - 07:30 -07:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Mizoram state legislative assembly fur thutkhawm naktip a tan tur atan dan thar siam tur 2 leh dan dinglai siamthat tur pakhat a lut tawh.
2. July thla tawp atanga tan, Myanmar raltlan zinga mi 4,741-te mit-naute leh kut ze thla chu lak a ni tawh.
3. ISRO chuan Ganganyaan Mission atana Integrated Air Drop Test (IADT-01) hmasa ber chu hlawhtling takin a enchhin.
4. Prime Minister Narendra Modia chuan vawiin hian ni hnih chamin Gujarat a tlawh dawn.

<><><>

ASSEMBLY

Tunkar Nilaini atanga tan tur Mizoram state legislative assembly fur thutkhawm atan dan thar siam tur 2 leh dan dinglai siamthat tur pakhat a lut tawh.

Assembly secretariat atanga thudawn danin sorkar dan siam tur thar hi urban development & poverty alleviation (UD&PA) department atangin The Mizoram Local Body Ombudsman Bill 2025 leh social welfare department atangin kutdawh khapna dan siam tur duan - The Mizoram Prohibition of Beggary Bill, 2025 te chu thehluh a ni tawh a. Hei bakah hian land revenue & settlement (LR&S) department atangin dan ding lai siamthat rawtna The Mizoram Land Revenue (Amendment) Bill, 2025 chu an dawng tawh bawk. Official resolution pakhat a lut tawh a, hei hi environment, forests & climate change (EF&CC) department atanga lut a ni. Hei bakah hian assembly inkhawma tawngka a chhan chi (starred question) 350 leh ziaka chhan chi (unstarred question) 124 a lut tawh bawk a ni.

Tun tum assembly fur inkhawm hi Assembly kal mek 9-na a inkhawm vawi 5-na tur a ni dawn a. Assembly speaker Pu Lalbiakzama hova business advisory committee (BAC) thukhawm chuan inkhawm hi ni 2 chhung ni turin an rel a. August ni 27 hian MLA ni lai thi ta Pu Lalrintluanga Sailo sunna hun hman a ni ang.

<><><>

LUNGLEI CRIME

Kumin chhung hian thubuai hrang hrangah Lunglei district-ah sorkar tan thubuai 613 khawih zingah hian thubuai 410 ah sorkar lam chakin thubuai 34-ah an chak lo.

He thu hi Lunglei Police te nen dan thar an zirhona-ah Lunglei District Public Prosecutor Pu Malsawmdawngliana’n a sawi a. Lunglei District Court-ah hian Public Prosecutor (PP)-1 leh Additional Public Prosecutor (PP) -7 awmin sorkar tana ukil hi an vaiin 8 an awm a. An zingah hian Addl. PP Pi C. Lalmihriati chu sorkar tana thubuai khawih tam ber niin thubuai 247 a buaipuah thubuai 198-ah hnehna changin thubuai 34-ah a chaklo a ni.

Lunglei district SP Pu J. Lalmuankima chuan police in thubuai an neih dan leh thubuai chin fel loh awm chungchang sawiin thubuai chhuitu (case IO) te nen an dinhmun bakah an tan ho dan tur leh an hriat tur tul te inhrilhfiyah hun an hmang a ni.

<><><>

BIOMETRIC ENROLMENT

July thla tawp atanga tan, Myanmar raltlan zinga mi 4,741-te mit-naute leh kut ze thla chu lak a ni tawh.

Home department hotute hnen atanga thu dawn danin biometric enrolment hna hi duh angin district hrang hrangah kalpui chak theih a ni lova, an harsatna tawh lian ber chu ‘Foreigners Identification Portal & Biometric Enrolment’ (FIP&BE) software hmanga hna an thawhna khawl hman Chiangkuang lo leh internet signal tha tawk lote a ni a. Hei hian an hna a tithuanawp nasa hle niin district hrang hrang official-te chuan an sawi a. Relief camp-a awmte a hlawma endik an awlsam rualin an fate hmun danga lehkha zira awm an lo awm ve bawk avangin an biometric data lak kim a harsa an tih bakah chhungte leh thiante belte bakah mi in luaha awm hmun karkik tak taka awmte chu khawtlang hruaitute tanpuina an hmu chungin hun a duh hle niin an sawi bawk.

Ministry of home affairs duhdana biometric enrolment chauh kalpui tura ngaih a nih lai-in biographic data pawh lak khawm nghal a ni a. Raltlan hming, nu leh pa, a lokalna khua, Myanmar a a awm lai leh Mizoramah enge a thawh tihte lak zel a ni. Tun hma khan mimal chanchin chhinchhiah hna hi kalpui chhuah vek a ni tawh a, temporary identity card pawh pek chhuah deuh vek an ni tawh chungin an dinhmun hi a danglam reng avangin mimal chanchin chhinchhiah hi thar thawh leh a nih thu home department hotute chuan an sawi a ni.

Myanmar raltlan hi mi 32,000 chuang Mizoramah an awm ni a ngaih a ni a. Bangladesh Chittagong Hill Tracts atanga raltlan hi mi 3,000 tling lo deuh an awma ngaih a ni a. Lawngtlai district-ah Bangladesh raltlan 2,000 chuang an awm a, Thenzawl khawpui-ah 299 awmin Lunglei district-ah Khawmawi khua-ah mi 63 an awm mek bawk a ni.

<><><>

ZEMAW BAWK CANCER INN

Zemabawk Aizawl a Cancer Hospital a inenkawl mek te Aizawl khawpui pawn Km 20 piah lam mi Cancer veite tana a thlawn veka awmna tur Apna ghar chu India rama damdawi siam chhuaktu lian tak INTAS Foundation chuan a din a, he In a awmte hi riahna, ei leh in engkim a thlawn veka pek an ni.

Zemabawk Apna Ghar ah hian room 8, Single room 2, double room 5 leh mi pathum awm theihna room 1 a awm a, damlo pakhat hian awmpui pakhat theuh an nei thei bawk.

He In ah hian room, mut puan, ei leh in pek vek an nih bakah damlo leh awmpuite tan wifi connection pek an ni bawk a, TV, lehkhabu an dah bawk. Thlakhat chhungin vawi li activity neiin an inhmukhawm thin a, damlo te leh awmpuite tana tangkai tur inhrilhna leh inkawmhona neih thin a ni.

He Apna ghar ah hian Hotu ber Project Assistant hovin Counsellor 2, security 3, house keeping & cook 2 an vaiin 8 an awm a, zo hnahthlak vek an ni.

Kan corr sawi danin, retianga cancer veite tana engkim a thlawn veka awm theihna INTAS foundation kaltlanga kan nei hi Aizawl khawpawm District hrang hrang leh thingtlang mite tan a tangkaiin an hlut hle a, room pawh hi an inchanlo deuh reng thin a ni.

INTAS foundation hian India ram khawpui lian deuh deuh Cancer hospital awmna bulah Apna ghar (kan in) hi an CSR hmangin hmun 41 ah an din a, Regional hrang hranga thenin NE pumpui hi Kolkota atangin enkawl a ni a, Mizoram leh hmun thenkhat hi Guwahati atanga enkawl an ni a, India ram pumpui INTAS foundation hi Gujarat ah Hqrs neiin an awm a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MISSION

ISRO chuan Ganganyaan Mission atana Integrated Air Drop Test (IADT-01) hmasa ber chu hlawhtling takin a enchhin. He mission enchhin hi vansanga zinhaw astraunaut te parachute hmanga him taka leia an lo tum leh theih dan tur a nia . ISRO, Indian Air Force, DRDO, Indian Navy leh Indian Coast Gaurd te thawhhonaa tihpuitlin a ni.

Defence Minister Rajnath Singh-a chuan Gaganyaan hmangin vansanga mihring zinchhuahtir turin India chu a inpeih thawhkhat tawh tih sawiin he Pu Singh-a mahni intodelh tura India zinkawnga pawimawh tak anih thu a sawi a ni.

<><><>

PM

Prime Minister Narendra Modia chuan vawiin hian ni hnih chamin Gujarat a tlawh dawn. Pu Modia chuan Gujarat-a a cham

chhungin hmasawna project cheng vaibelchhe 5400 hu Khodaldham ground, Ahmedabad atangin a hawng dawn a. He project hi urban development, energy, kawngpui leh relkawng siamna project a ni . Naktukah Ahmedabad-a Hansalpur atangin hybrid battery electrodes leh eltric hmang lirthei ram 100 chuanga thawnehhuah tur a tlangzarh bawh ang.

<><><>

ISRAEL

Isreal sipai thlawhna ten nimir khan Yemen khawpui Sanaa hmun engemawzat an kap a. Heng zingah hian President chenna bul leh tuialhthei dahkhawlna hmunte pawh a tel. Israel sipaite hian Houthi pawlte missile kulhna hmun an bei a. Mi pahnih an thih thu dawn a ni tawh a. Israel leh Iran thlawp Houthi te inkar boruak a tihsan phah hle nia thudawn a ni.

<><><>